

Kurgan strome uit Zwette Steppe!

Iejl veir int Noorde zitte ze ok al fameus in de mest! De provincies derbove in de snieje emme ok serieuze probleme want na die Kozakke en unne vodka (goe spul traaves!) komt er nog ander krapuul út die voze Zwette Steppe gestruumd. Tzen nort schent halve bieje, in da oepzicht schele ze ni veul me die Kozakke, mor die Kurgan vrete nor t schent oek nog is de laake van un slachtoffers oep! Niks da veur unne neus sta overleeft lank en ze plundere al wa beweegt. Tgeen da ni beweegt steke ze in braand!

Al chance da ze veir int Noorde zitte, tot hie grake ze toch noewet. Voorlopig rekene die soldútjes on de grenze van de Zwette Steppe me ze af, geholpe deur de Kozakke die naa trug zo goe as zonder land blaake te zitte.



Spoekdorp neffest Sterremeer!

Van onze korrespondent ter plúste

Een tekke geleeye is er dus blaakbor een gans dúrp verdweene dor on da aarig Sterremeer veir int Ooste, zelfs verbaa die bosse wor niemand in durft te goán. Nen handelskaravaan die dr passeerde merkte datter gin kat nemieje rondliep in de straate, zelfs den eirberg was klink leeg! Ze zen dan mor rap veuts getrokke en achteraf hei een delegatie soldate onder laading van nen échte Zwette Kroâ gans da dúrp útgekamd. Boâte ee paar laake int woáter emme ze niks gevonne. Een paar van die soldútjes beweerde te zen aangevalle deur iet van út het woáter, soemmigste zegge dat waterduvels ware. Mor daa is natuurlek niks van bevestig. Wa wel gewete is is da iejl da gebied naa as behekt wút beschaat en datter giejn zinnig mens nog durft te gon woene út schrik ver die waterduvels. Zelfs de dúrpkes út den oemtrek beginne nor t schent leeg te stroeme.

Tis de kans as ge goeikoep wa grond op de kop wilt tikke, mor tis te betwaafele da da wel zoen goei idee is oep de moment. Ge moet dan oek nog is last die aarige bosse en last plakke vol úrke wilde dr gerake. Wedde da dr wer nenhoep half-elfe ga denke da da de kans van úlle leve is?

Al baa al emme welle t hie nog zo slecht ni, tis al goe da die aarige dinges allemo ginderachter gebeure.

Monneke



Wolfgarters geve Ogres een goe pak slaag!

In de besniejde beirge, goe veir weg alwee, zen ze al jare aant oorlogske spele tusse die wolfgarters en de ogres. Naa emme de wolfgarters de ogres nort schent fameus truggesleege tot in ulder fort. De wolfgarters zouwe een aarig soort magie gebrúkt emme (valsgepeld dus) waartege de ogres gien verweer hadde. Dr ware naa wel mor weinig ogre toeveneirs baa dus as die manne ulle dr mee kome moeie zalt misschin ziejr wúrre doen veu de wolfgarters. We haave úlle zeker en vast oep de hoewgte van dees spannende gebeurtenisse! En ge wet... as ge oewt nen ogre toeveneir tegekamt: plat oep de grond gon ligge en bidde oem hulp. En dattem al gegete hei diejen dag.

Cois

Hekseraa Irefl Schotegem!

Ge gaaget ni geluuve mor tis van da, in Schotegem emme ze naa al een por weeke last van een heks die alle melk zuur lot wúrre, Fonne van zot Florreke boákkraampe hei gegeve en der veu hei gezúrgd da de klaane van Hiejte Tes geboore wier me mor vier vingers on zen linkerhaand! da menneke ga der gans zen leve mee wúrre útgelache. Den burgemeijster van Schotegem ei direkt ne brief geschrewe nor onze Graaf oem te vrage datter niemand da is kan kome onderzuuke, natuurlek moet dieje mens wer de probleme van die karottentrekkers van over den Euvel oeplosse.

As ge naa iejn van dees dage die manne van Mechnar last ons dúrp zie passere dan wette direkt oe laat et is. Die heks ga ter ni goe van zen as die driftkoppe me un fakkels ulle dr mee gon bemoeie.

Tis toch misschinst ni slecht as ge elle dochters de komende dage binneheft en ni te aarig doe moeste die manne passere. Tzal ni den iejste kieje zen da ze de verkierjde oep den brandstapel zwiere.

Veur de rest as ge nog aarige dinges gezien moest emme of bepolve mense verdenkt meugde da natuurlek altaa gon melde baa de prister van de Goei Doewd of de kaptaan van de wacht, dan zulle die manne un der ok is mee gon bemoeie. En die van de wacht kennende gon ze der nogal ne vús oepgaan, zeker ast is oem maskes t'ondervrage.

't Is naa mor te hope da die heks ni van zinnis is oem nor ons dúrpke af te zakke want het leste da we hie kunne gebroáke is zuur melk of vente me boákkraampe. In Schotegem zaa ze eur vooral verstoppe in de bosse en rond t moeras, dus dan wette oek direkt wor da ge best ni nortoe ga, kwestie van giejn klaan manne me mor vier vingers te koepe.

As ge 't ons vrogte is da wer nen hoep geziejver van iejn of ander viswaaf da ni kan verkrobbe da een ander nor heure vent gepinkt hei oep de dúrpsfiejste afgeloopde zeumer. Mor we zeggen t aa toch liever dan da ge van niks zot wete.

Fel Fikske

Boer zkt. Vraa!

Da Bèrreke Beirkaar ni vant stroat gerokt is niks nief, zúlf al heitem tonne geld steke. Naa issem blaakbor al zoe wanhoopig dattem geld belooft on d'iejrste de beste sloor die me hùm wilt traave. En as ge Bèrreke ee bikke kent wette da da maske serieuus wanhopig moet zen. Mor naa blekt dus dattem serieuus wa respons hei gekrege oep zen annonske, en da is veur ee groet diejl te danke on dees gazetteke waarin m dus da annonske geplúst had. Ni minder as twiehonderd brieve heitem al gekrege de leste weke, soemmigste daar zat de doáf nog aangebonne. M is ze naa iejn ver iejn ont leze emme we út goei bron vernome, ver wie Bèrreke kent wet dan oek da die maskes nog ee paar jaar meuge wachte want Bèrrekeis noewt van de slumste gewest. M hei veurig joar nog geprobeerd ne stier te melke oem dattem doecht dat een keui was! De boere emme toen weke lank me niks annes gelache in den eirberg en Bèrreke zat er nuffest me zn tweeje hanne in de plúster.

Wa haave elle zeker en vast oep de hoewgte van dees spannende gebeurtenis mor persoanlek denke we da Bèrreke zn aage beter zaa bezighaave me z'n keuie dan me dees fentonte.

Fel Fikske

betold annonske

Lombardi

meest prestigieuze handelshuis uit Santiago

Inkoop en verkoop aan de meest gunstige prijzen. Nuis Lombardi werkt samen met de hoogst bedreven runemagiers ende alchemisten van het Geele Gilde, zodat u steeds verzekerd bent van de beste kwaliteit!

Ook ruithandel is steeds mogelijk. Nuis Lombardi is steeds op zoek naar potentekruiden, spreukrollen ende broullusels allerhande. Voor meer informatie ende goede zaken wend u tot onze contactpersoon ter plaatse...



Grote kús in Santiago!

't Is dan aandelaak zoe waad... ze zen er al zoe lank over aant múzze mor de militie onder laading van de Zwette Kroâ emme dan andelek ee paar louche bars en gokhole opegestampt en d'r alle halfelf krapuul buitegeslege. Schent dat mor t begin is as we de woordvoerder van de Zwette Kroâ meuge geluuve. Ze gon ni stoppe alveures alle halfelfe krapul t stad is buitigestampt. Een paar weke trug hei ne Zwette Kroâ oep zennen alliejn nog een stammenee doen ontploffe, gienien van 't krapuul da binne stak kont nog navertelle. Graave manne, die Zwette Kroie!

Tis naa mor te hope da al da halfelfe krapul ni nor hie komt afgezakt want dan zen me ielema goe af.

Fel Fikske

Puntore gearriveerd!

Vershit ni as ge ze zie mor van over t water kome dr Elfkes nor Mythandir afgeveire. Waaroem ze naa iniens trug nor hie kome is alleman een raadsel mor verget ni dat machtige toeveneirs zen stuk ver stuk. En ze kunne van oep kilometers afstand ne paal in iene zn oewg schiete ast mut. Dus best da ge vrindelek licht en aa dan rap út de voete makt of da ge ze gewoon út de weg ga, dan eddet minste last. Lan'ked hei ze schent zelf útgenodigd om mee te kome klappe oep dieje Raad waar we t al iejr over emme gehad.

In ieder geval, naa wette da ze kome dus ge moet naa ni verschie te as dr merge ene me puntore ver aa deur sta. Nen halfelf is al erg genoeg, de pikt alles wa los hangt, mor echte elfkes das ne primeur ver ons dúrpke.

Jos

Albert Hamerslag

Plaatscheleycken hoefsmid ende metaalbewerker. Ook voor herstellingen aan uwer pantser.



Redaktie: Jos, Fel Fikske, Cois van Fillomeen van Josiane en dieje rose van Rita.

Het Voordonsch Vot wút geschreeve en gedrukt in de Beekstraat in Voordonk. As ge probleme moest emme me wa hie geschreeve ston ge dan zage bu de manne van de wacht mor komt ni bliete aan ons den.

